



**PEMBINAAN KELUARGA SEJAHTERA: ANALISIS TERHADAP PRINSIP
'KELUARGA BAHAGIA RAKYAT SEJAHTERA' DALAM TRANSFORMASI
TERENGGANU BAHARU**

**[BUILDING A HAPPY FAMILY: AN ANALYSIS OF THE 'HAPPY FAMILY
HAPPY NATION' PRINCIPLE IN NEW TERENGGANU TRANSFORMATION]**

*¹Wan Mohd Yusuf Wan Chik, ²Abdul Wahab Md. Ali, ³Zulkifli Mohamad, ⁴Ahmad Faizal Ramly & ⁵Farah Syazrah Mohd Ghazalli

^{1,2,3,4}Fakulty of Islamic Contemporary Studies, Universiti Sultan Zainal Abidin Kampus Gong Badak, 21300 Kuala Terengganu, Terengganu.

⁵ Faculty of Applied Social Sciences, Universiti Sultan Zainal Abidin Kampus Gong Badak, 21300 Kuala Terengganu, Terengganu.

*Corresponding author: abdulwahabmdali@yahoo.com

ABSTRAK

Sebuah keluarga yang sejahtera perlu memiliki keseimbangan antara dalaman dan luaran. Kriteria sebuah keluarga yang sejahtera ini boleh difahami menerusi penulisan para ilmuwan Islam di dalam kitab-kitab mereka. Realitinya, keluarga Islam masa kini sedang menghadapi ancaman yang cukup besar sehingga boleh membawa kepada keruntuhan akhlak, sosial dan ekonomi. Atas kesedaran ini, kerajaan negeri Terengganu melalui Transformasi Terengganu Baharu (TTB) telah melancarkan sepuluh program khas di bawah prinsip 'Keluarga Bahagia Rakyat Sejahtera'. Justeru, kajian ini menganalisis program-program yang telah diperkenalkan di bawah prinsip tersebut dari sudut sejauhmana ia membantu dalam pembinaan keluarga sejahtera. Beberapa cadangan dan penambahbaikan turut dilontarkan bersesuaian dengan keperluan sebenar sebuah keluarga yang sejahtera. Kesimpulannya, berdasarkan program-program yang dilancarkan di bawah prinsip tersebut, ia dilihat memenuhi sebahagian keperluan yang perlu dimiliki dalam sebuah keluarga sejahtera. Pun begitu, masih terdapat beberapa kelompongan yang perlu diperbaiki dari semasa ke semasa terutamanya berhubung elemen ilmu, ibadah, persiapan sebelum perkahwinan dan pengangkutan.

Kata Kunci: Keluarga, kesejahteraan, kegembiraan, Malaysia, Transformasi Terengganu Baharu

ABSTRACT

A happy family needs to possess a balance between its interior and exterior needs. Such criteria for wellness in the family are also discernable from the voluminous writings of Muslim scholars. However, the reality is, Muslim families nowadays are facing great challenges which have caused moral disintegration, social problems and chaotic economic situations. The government of Terengganu under the "Happy Family Happy Nation" principle in its New Terengganu Transformation initiative has launched 10 special programs to address these challenges. This study aims to analyse the effectiveness of the programs in promoting the wellbeing of families. This paper also offers suggestions for the

betterment of the programs, in accordance with the real needs for a happy family. This paper concludes that the programs have partially fulfilled the requirements needed for creating a happy family. Nevertheless, there are several shortcomings that need to be attended to from time to time especially in terms of strategic knowledge, worship, premarital preparation and transportation.

Keywords: Family, happiness, Malaysia, New Terengganu Transformation, peacefulness.

1.0 PENDAHULUAN

Keinginan untuk memiliki sebuah keluarga yang sejahtera merupakan suatu fitrah semula jadi manusia. Lantas sebagai satu agama yang meraikan fitrah manusiawi, Islam sangat menekankan soal pembinaan dan pembangunan institusi kekeluargaan. Kehidupan berkeluarga yang patuh kepada agama dengan mematuhi syariat Islam menjadikan tatacara kehidupan manusia itu lebih jelas, fokus, lengkap dan komprehensif. Pendidikan terhadap anak-anak mestilah menepati roh Islam secara menyeluruh bagi menjamin kebahagiaan dunia dan akhirat (Sulaiman & Ismail, 2017).

Realitinya, keluarga Islam masa kini sedang menghadapi ancaman yang cukup besar sehingga membawa kepada keruntuhan akhlak, sosial dan ekonomi. Ia bukan sahaja memberi kesan terhadap keluarga bahkan terhadap persekitaran dan negara (Ismail et al., 2017). Hal sebegini terjadi lantaran kegagalan umat Islam itu sendiri dalam membangunkan potensi-potensi dalam keluarga serta tidak memahami keperluan sebenar dalam pembinaan sebuah keluarga Muslim. Kriteria sebenar sebuah keluarga yang sejahtera ini boleh difahami menerusi al-Quran, hadis dan penulisan para ilmuwan Islam (Md. Ali, 2017).

Kerajaan negeri Terengganu melalui Transformasi Terengganu Baharu (TTB) telah melancarkan 10 program khas di bawah prinsip ‘Keluarga Bahagia Rakyat Sejahtera’. Ia dilaksanakan sebagai satu usaha pihak kerajaan untuk meneguhkan semula institusi kekeluargaan di negeri Terengganu. Justeru, penulisan ini akan meneliti kandungan program-program yang telah diperkenalkan di bawah prinsip tersebut seterusnya mengemukakan beberapa elemen kesejahteraan keluarga Muslim yang wujud dalam program tersebut.

2.0 KONSEP DAN ELEMEN PEMBINAAN KELUARGA SEJAHTERA

Secara umumnya, kesejahteraan sesebuah keluarga itu mempunyai pelbagai definisi dan kayu ukur. Konsep kesejahteraan itu sendiri mempunyai banyak dimensi yang menjadikannya sukar didefinisikan (Wan Ahmad et al., 2009). Hal ini boleh diperhatikan menerusi penulisan para sarjana Islam dan Barat yang memberikan definisi yang berbeza apabila menyentuh soal kesejahteraan atau kebahagiaan (Sharmani & Minggal, 2011). Kenyataan yang sama turut dinyatakan oleh Shin dan Johnson (1978) di mana konsep kesejahteraan itu adalah suatu konsep yang luas dan abstrak sehingga boleh membawa erti yang berbeza-beza antara individu dengan individu yang lain.

Para ilmuwan Islam mempunyai beberapa pandangan berhubung definisi keluarga sejahtera. Al-Zuhayli (2000) menyatakan bahawa keluarga yang sejahtera ialah keluarga yang sentiasa iltizam dengan undang-undang yang disyariatkan Allah serta berpegang teguh dengan akhlak dan adab Islam. Ahli keluarga tersebut akan berusaha untuk kebaikan dunia dan akhirat, berusaha untuk hidup dalam masyarakat dengan baik untuk mencapai kebahagiaan dunia dan kemuliaan akhirat.

Definisi Al-Zuhayli telah diperincikan dengan kenyataan Najib (1980) bahawa keluarga sejahtera merupakan satu pusat permulaan bagi komuniti manusia. Ia bermula dengan proses perkahwinan di antara lelaki dan wanita, ikatan tersebut dibina atas asas yang berkekalan dan teguh. Lelaki dan wanita perlu memelihara hak dan kewajipan antara satu sama lain, tahu dan faham keperluan dan bukan keperluan pasangan masing-masing. Proses ini akhirnya akan menghasilkan sebuah kehidupan yang sejahtera, teguh dan berkekalan. Sekiranya mempunyai zuriat, pendidikan dan asuhan mampu diberikan dengan sempurna.

Al-Shahud (2009) pula mendefinisikan keluarga sejahtera dari sudut simptom dan implikasi iaitu sebuah keluarga yang tiada permusuhan dan pergaduhan, tiada kedengaran kata-kata yang kesat, dan tiada pertengkaran yang teruk. Setiap individu dalam keluarga tersebut mendapat kerehatan, ketenangan dan kedamaian. Keluarga sejahtera ialah sebuah keluarga yang dapat merasa senang terhadap satu sama lain dan terhadap hidup sendiri serta mempunyai objektif pembinaan keluarga yang jelas dan positif. Bagaimanapun, definisi ini berbeza dengan Lembaga Penduduk dan Pembangunan Keluarga Negara (LPPKN) yang mendefinisikan kesejahteraan keluarga sebagai keadaan keluarga di suatu negara yang berada pada tahap yang selamat, sihat, selesa, harmoni dan mendamaikan (Lembaga Penduduk dan Pembangunan Keluarga Negara, 2017).

Kesimpulannya, konsep kesejahteraan keluarga menurut Islam adalah konsep kesejahteraan yang syumul dan mempunyai identiti dan matlamat yang tersendiri berbeza dengan konsep kesejahteraan keluarga menurut bukan Islam. Para ilmuwan Islam sangat mementingkan nilai ketuhanan serta hubungan dengan Allah sebagai asas kesejahteraan kemudian diikuti dengan kesempurnaan tuntutan material dan mental. Objektif pembinaan keluarga yang sebenar iaitu untuk mencapai keredhaan Allah SWT dan mengikuti sunnah Nabi SAW. Sebuah keluarga yang telah mencapai kesempurnaan dari sudut material dan mental tetapi tidak mematuhi undang-undang dan syariat Allah bagaimanapun tidak dikira sebagai sebuah keluarga sejahtera. Ini kerana keluarga sejahtera bererti bahagia dan sejahtera dalam urusan dunia serta mendapat kemuliaan di akhirat.

Elemen kesejahteraan keluarga pula boleh difahami menerusi beberapa sumber seperti al-Quran, hadis dan penulisan para ilmuwan Islam sama ada yang silam mahupun kontemporari. Pemahaman berhubung kesejahteraan keluarga boleh difahami secara umum menerusi beberapa surah utama dalam al-Quran seperti surah al-Nur, al-Talaq, al-Baqarah, Ali Imran dan al-Nisa' (Jabatan Perdana Menteri, 1989). Secara lebih terperinci, ia boleh difahami menerusi konsep kesejahteraan dalam menerusi surah al-Rum ayat 21 dan konsep pencegahan dalam keluarga menerusi surah al-Tahrim ayat 6 (Asyur, 1997). Dari sudut hadis pula, ia boleh difahami menerusi beberapa hadis Nabi SAW yang menyentuh soal kekeluargaan Islam seperti hadis tentang hak dalam rumah tangga dan aspek nafkah dalam keluarga. Secara lebih terperinci, ia boleh difahami menerusi konsep kesejahteraan zahir dan batin menerusi hadis *al-Sa'adah* (Al-Siddiqi, 1998).

Menerusi penulisan primer dan sekunder dalam kekeluargaan Islam, elemen kesejahteraan keluarga boleh diperhatikan menerusi beberapa aspek penulisan. Sebagai contoh, penulisan berhubung aspek pembentukan individu yang baik dalam keluarga, aspek hukum-hakam dalam keluarga, aspek keperluan dalam rumah tangga serta dan aspek pendidikan anak-anak (Md. Ali, 2017).

Aspek pembentukan individu dalam keluarga boleh dilihat menerusi pembentukan individu sama ada sebagai seorang anak, ibu bapa, suami isteri, adik-beradik dan lain-lain seperti yang dibahaskan dalam Al-Za'Balawi (1985), Abdul Rasyid (2011), dan Al-Hasyimi (2010). Aspek

kedua iaitu aspek keperluan dalam rumah tangga menjelaskan garis panduan khas berhubung keperluan dalam rumah tangga seperti yang dibincangkan dalam Hawwa (1988), Awad Ibrahim (1983), Md. Yusoff Al-Haj (1990), Jawatankuasa Penyemak (2008), dan Al-Nahlawi (1986). Aspek ketiga pula iaitu aspek pendidikan anak-anak dibahaskan dalam Naseh Ulwan (2008), Muhammad dan Md. Nawi (2013), dan Hashim (2002). Aspek terakhir pula iaitu aspek hukum-hakam perkahwinan boleh dilihat menerusi aspek pernikahan, perceraian dan faraid sebagaimana disebut dalam bab *al-Ahwal al-Sakhsiah*.

Berdasarkan analisis yang dilakukan terhadap penulisan kekeluargaan Islam di atas, dua elemen utama dalam pembinaan keluarga sejahtera adalah perkahwinan sejahtera dan rumah tangga sejahtera (Md. Ali, 2017). Secara ringkasnya, elemen yang diperoleh daripada analisis kajian lepas ditunjukkan dalam jadual 1 seperti di bawah.

Jadual 1: Elemen Rumah Tangga Sejahtera dalam Keluarga Menurut Islam

Elemen	Komponen	Elemen	Komponen
Perkahwinan Sejahtera	Sebelum Perkahwinan _____ Semasa Perkahwinan	Rumah Tangga Sejahtera	Pengurusan Rohani Pembudayaan Ilmu Pembudayaan Ibadah Ekonomi Keselamatan Pengangkutan Komunikasi Kediaman Kesihatan Persekutaran

Terdapat dua komponen dalam elemen Perkahwinan Sejahtera iaitu komponen Sebelum Perkahwinan dan Semasa Perkahwinan. Komponen Sebelum Perkahwinan boleh dilihat daripada aspek pemilihan calon, proses peminangan dan proses pertunangan. Bagi komponen Semasa Perkahwinan, ia boleh dilihat daripada aspek akad pernikahan dan walimatul urus. Dalam elemen Rumah Tangga Sejahtera pula terdapat sepuluh komponen iaitu pengurusan rohani, pembudayaan ilmu, pembudayaan ibadah, ekonomi, keselamatan, pengangkutan, komunikasi, kediaman, komunikasi, kesihatan dan persekitaran.

Komponen pengurusan rohani dilihat daripada aspek pengurusan emosi, pengurusan stres dan pengurusn konflik. Komponen pembudayaan ilmu pula dilihat daripada aspek jenis ilmu, pemilihan guru, pemilihan tempat belajar, pemilihan bahan bacaan dan kemudahan perpustakaan di rumah. Bagi komponen pembudayaan ibadah, ia dilihat daripada aspek jenis ibadah, kualiti ibadah, tempat ibadah dan qudwah ibadah manakala komponen kediaman pula dilihat daripada aspek bentuk rumah, kemudahan asas, kebersihan dan pembantu rumah.

Seterusnya, komponen ekonomi dilihat daripada aspek taraf hidup, pendapatan, nafkah, simpanan, perlindungan peribadi dan pinjaman. Komponen keselamatan dilihat daripada aspek keselamatan luar rumah, keselamatan dalam rumah dan undang-undang. Bagi komponen kesihatan, ia dilihat daripada tahap kesihatan, cara pemakanan, aktiviti riadah dan hubungan kelamin. Aspek pengangkutan dilihat daripada aspek kenderaan dan jaringan perhubungan. Komponen komunikasi pula dilihat daripada aspek pertuturan, bahasa badan dan perantaraan manakala komponen persekitaran pula dilihat daripada aspek kaum kerabat, kawan, institusi agama, guru, pemimpin masyarakat, tetamu dan jiran.

Kesimpulannya, elemen keluarga sejahtera yang terdiri daripada perkahwinan sejahtera dan rumah tangga sejahtera sebagai asas utama ini merupakan kayu ukur yang digunakan untuk menilai Prinsip Keluarga Bahagia Rakyat sejahtera yang terkandung dalam Transformasi Terengganu Baharu (TTB).

3.0 PROGRAM UTAMA DALAM PRINSIP ‘KELUARGA BAHAGIA RAKYAT SEJAHTERA’

Prinsip ‘Keluarga Bahagia Rakyat Sejahtera’ merupakan prinsip ketiga dalam Transformasi Terengganu Baharu (TTB) yang dilancarkan oleh Menteri Besar Terengganu, Dato’ Seri Haji Ahmad Razif bin Abdul Rahman dalam usaha untuk meneruskan kesinambungan pembangunan negeri Terengganu ke arah masa depan yang lebih gemilang. Dalam prinsip ini, terdapat sepuluh program atau perkhidmatan utama yang diperkenalkan dengan tujuan yang berbeza. Kesemua program ini dilaksanakan di bawah seliaan Yayasan Pembangunan Keluarga Terengganu (YPKT).

Berdasarkan risalah edaran Yayasan Pembangunan Keluarga Terengganu (2015) serta sesi temu bual penulis yang diadakan bersama Timbalan Penolong Pengarah Yayasan Pembangunan Keluarga Terengganu, Puan Ramlah Idris telah menghuraikan perkhidmatan sebagaimana berikut:

3.1 Sagu hati Anak Kelahiran Terengganu

Dalam program ini, Kerajaan Negeri Terengganu telah menyediakan tabungan awal kepada setiap kelahiran baharu di negeri ini. Sumbangan yang diberikan dibuat dalam bentuk Skim Simpanan Pendidikan Nasional (SSPN-i), sagu hati berjumlah RM 100.00 bagi setiap kanak-kanak. Tujuannya untuk menggalakkan tabungan pembelajaran bermula dari awal kelahiran serta meraikan kanak-kanak yang dilahirkan di Negeri Terengganu.

3.2 Program Pengurus Kediaman (Home Manager)

Diwujudkan bagi mencapai hasrat Kerajaan Terengganu menangani masalah kebergantungan kepada pekerja asing dalam kerjaya Pengurus Kediaman serta membantu golongan miskin serta ibu tunggal meningkatkan taraf hidup dan pendapatan keluarga. Program ini mengandungi modul yang lengkap seperti kebersihan dan kekemasan, tata sajian dan hidangan makanan, pelupusan sampah, cucian pakaian, pembersihan umum, penjagaan orang tua, bayi dan kanak-kanak serta motivasi perubahan minda dan sebagainya.

Tujuannya untuk mewujudkan kerjaya Pengurus Kediaman sebagai satu kerjaya yang profesional dan diterima positif oleh masyarakat, mengurangkan kebergantungan kepada warga asing dalam kerjaya Pengurus Kediaman, membantu masyarakat yang memerlukan perkhidmatan pengurusan kediaman, meningkatkan pendapatan isi rumah agar berkemampuan keluar dari kemiskinan.

3.3 Walimah Perdana 1 Terengganu

Dilaksanakan untuk memberi pengiktirafan dan penghargaan kepada keluarga muda di samping mengembangkan syiar Islam melalui amalan meraikan pasangan baru berkahwin. Ia juga mendorong masyarakat supaya meninggalkan gaya hidup yang tidak sihat dan memilih

untuk mendirikan rumahtangga melalui ikatan perkahwinan yang sah. Program ini juga mendorong hasrat kerajaan untuk meningkatkan kualiti hidup berkeluarga rakyat Terengganu di samping menangani isu perceraian pada awal usia perkahwinan.

3.4 Akademi Jahitan

Program ini bertujuan untuk mewujudkan peluang pekerjaan serta bagi menambah pendapatan golongan fakir miskin dan ibu tunggal.

3.5 Cakna Warga Emas

Program ini bertujuan memajukan potensi warga emas agar mereka terus aktif dan produktif dalam pembangunan negara serta mewujudkan peluang untuk mereka terus hidup dengan penuh moral. Ia juga dapat meningkatkan kehormatan dan martabat warga emas dalam keluarga, masyarakat dan negara serta mewujudkan suasana kebersamaan bagi mengeratkan hubungan kemesraan, kasih sayang dan bertanggungjawab.

Kelab Warga Emas YPKT telah ditubuhkan di setiap DUN bagi memastikan agar setiap aktiviti yang dijalankan sampai dan diterima oleh setiap warga emas di seluruh negeri. Antara sub-program yang dilaksanakan di bawah program ini adalah sebagaimana berikut:

Jadual 2: Sub-Program di bawah Program Cakna Warga Emas

Bil	Perkhidmatan	Huraian
1	Warga Emas Aktif, Sihat & Produktif	Memberi pendedahan aktiviti-aktiviti seperti bersenam, pemeriksaan kesihatan, ceramah dan nasihat tentang penjagaan fizikal dan mengesan penyakit peringkat awal.
2	Kesukarelawanan Warga Emas	Melatih dan merangsang sukarelawan warga emas dalam menyumbang bakti kepada masyarakat dan negara.
3	Lawatan Warga Emas	Memberi peluang perkongsian dan pendedahan melalui pengalaman serta kecaknaan kepada warga emas yang tersisih melalui lawatan warga emas.
4	Inter-Generasi	Memberi dan mengembangkan kemahiran dan pengetahuan yang dimiliki oleh warga emas kepada generasi muda terutamanya dalam bidang kraftangan, pertukangan, masakan tradisional dan sebagainya.
5	Mesra Warga Emas	Mewujudkan kesedaran dan menerapkan amalan murni untuk mempererat hubungan antara masyarakat dan warga emas.
6	Mesra Warga Emas Kerohanian	Merupakan aktiviti keagamaan yang disertai oleh warga emas untuk mempertingkat dan menambahkan ilmu agama serta memupuk nilai-nilai murni.

3.6 Cakna Ibu Tunggal

Program Cakna Ibu Tunggal dilaksanakan bertujuan untuk menyatukan dan memperkasakan jati diri golongan ibu tunggal supaya segala permasalahan dan kebajikan mereka dapat dibantu. Antara objektifnya juga untuk membantu menyelesaikan masalah yang dihadapi oleh golongan

ibu tunggal, mewujudkan kesedaran tentang tanggungjawab bersama dalam menjaga kebijakan ibu tunggal dan keluarga serta menggalakkan ibu tunggal berdikari dan meningkatkan ekonomi keluarga.

Kelab Ibu Tunggal YPKT ditubuhkan di setiap DUN bagi memastikan agar program yang dilaksanakan diterima oleh setiap ibu tunggal di seluruh negeri yang berjumlah sekitar 18,000 orang. Antara sub-program yang dilaksanakan di bawah program ini adalah sebagaimana berikut:

Jadual 3: Sub-Program di bawah Program Cakna Ibu Tunggal

Bil	Program	Huraian
1	Program Pengupayaan Ibu Tunggal	Untuk memastikan Kelab Ibu Tunggal mampu berfungsi secara efektif bagi membentuk kumpulan Ibu Tunggal yang mampu bersaing & berdaya maju.
2	Bantuan Pengurusan Kelab Ibu Tunggal	Membantu jawatankuasa kelab ibu tunggal menguruskan aktiviti kelab.
3	Program Peningkatan Ekonomi	Memberi peluang kepada golongan ibu tunggal untuk meningkatkan taraf ekonomi.
4	Program Bimbingan Undang-Undang	Memastikan ibu tunggal memahami dan menyedari hak mereka dari sudut perundangan.
5	Program Bimbingan Kekeluargaan & Pendidikan	Memberi pendedahan kepada ibu tunggal tentang kemahiran keibubapaan serta program keagamaan.
6	Program Kesedaran & Bimbingan Kesihatan	Memberi bimbingan & kesedaran kepada ibu tunggal tentang kepentingan penjagaan kesihatan. Memberi khidmat nasihat & rawatan daripada pakar, kepada golongan ibu tunggal yang memerlukan.

3.7 2nd Honeymoon

Program ini disasarkan terhadap pasangan yang usia perkahwinannya kurang lima tahun yang mempunyai masalah keluarga. Pasangan dirujuk oleh Jabatan Kehakiman Syariah bahagian Sulh juga pasangan yang sedang menerima khidmat kaunseling keluarga dengan LPPKN dan Jabatan Hal Ehwal Agama Islam Terengganu (JHEAT). Ia dilaksanakan untuk meningkatkan penguasaan ilmu kekeluargaan, pengurusan minda dan emosi serta sikap positif ke arah memantapkan dan meningkatkan hubungan suami isteri, ia juga bagi membina keluarga yang utuh, penyayang, bahagia dan sejahtera melalui pengurusan masa dan sumber keluarga yang terancang.

Selain itu, program ini bertujuan meningkatkan kefahaman antara pasangan dalam menangani konflik dan cabaran hidup berkeluarga secara kreatif dan penuh bermakna dalam menyelesaikan masalah serta memupuk sikap kecaknaan, ambil berat dan sikap keprihatinan yang tinggi terhadap kehendak pasangan dan ahli keluarga.

3.8 Taska Permata Keluarga

Ia merupakan pusat asuhan kanak-kanak di bawah kelolaan Yayasan Pembangunan Keluarga Terengganu dengan konsep bermain sambil belajar serta mendidik secara tidak formal serta penekanan terhadap solat, Iqra', doa, bahasa Inggeris dan hafazan. Taska ini menyediakan khidmat pengasuhan, penjagaan dan pendidikan bayi dan kanak-kanak empat tahun dan ke bawah.

Ia bertujuan membantu keluarga yang menghadapi masalah penjagaan dan pengasuhan anak-anak khususnya ibu bapa yang bekerja. Ia juga menyediakan perkhidmatan asuhan awal bagi menyempurnakan perkembangan menyeluruh kanak-kanak empat tahun ke bawah, menyediakan kakitangan atau guru yang berkemahiran, serta meningkatkan kesedaran kepada ibu bapa berhubung program keibubapaan.

3.9 Program Jaya Diri

Ia merupakan program yang menumpukan kepada usaha membangkitkan kesedaran serta menggalakkan keluarga miskin berdikari dalam usaha meningkatkan pendapatan keluarga. Peserta dilatih dengan disiplin dan kemahiran asas pengurusan diri. Peserta seterusnya menerima pinjaman modal tanpa faedah untuk menjalankan aktiviti yang meningkatkan pendapatan isi rumah. Penyertaan diutamakan kepada golongan wanita sebagai wakil isi rumah.

Program ini bertujuan untuk melahirkan keluarga berdikari di kalangan isi rumah mudah miskin dengan cara mereka bekerja untuk membantu diri mereka sendiri, membantu meningkatkan ekonomi isi rumah yang berpendapatan rendah, memberi galakan kepada kaum wanita untuk membantu suami dalam usaha menambahkan pendapatan, dan menerapkan nilai-nilai positif kepada golongan sasaran seperti berdisiplin, bertanggungjawab, berani dan bersatu ke arah mencapai objektif program.

3.10 Desa Keluarga

Ia merupakan satu Projek Perumahan Rakyat (PPR) bagi membantu menyediakan kemudahan tempat tinggal yang selesa untuk golongan miskin, setinggan, pekerja kilang, pekerja dan penduduk yang menghadapi kesukaran mendapatkan rumah di persekitaran tempat kerja mereka.

Program ini bertujuan untuk menyediakan tempat tinggal yang selesa dan setaraf dari segi jasmani dan rohani kepada golongan berpendapatan rendah, mengurangkan kos sara hidup para pekerja, merangsang ke arah peningkatan produktiviti kerja para penghuninya, memupuk semangat persaudaraan serta nilai-nilai kekeluargaan yang tinggi di kalangan penghuninya dan mengurangkan masalah gejala sosial di kalangan para pekerja terutamanya sektor industri dan perkilangan.

4.0 ANALISIS TERHADAP PRINSIP ‘KELUARGA BAHAGIA RAKYAT SEJAHTERA’

Berdasarkan sepuluh program yang telah dilancarkan, ia dilihat telah memenuhi sebahagian besar daripada keperluan dalam sebuah keluarga sejahtera yang digariskan dalam kajian di atas. Keperluan dalam keluarga yang paling banyak dipenuhi ialah keperluan ekonomi (lima

program) kemudian diikuti dengan keperluan kesihatan dan pembudayaan ilmu (empat program), keperluan pengurusan kerohanian dan pembudayaan ibadah (tiga program), keperluan keselamatan, komunikasi dan kediaman (dua program). Keperluan semasa perkahwinan dan persekitaran pula masing-masing sebanyak satu program.

Program Saguhati Anak Kelahiran Terengganu memenuhi tuntutan ekonomi dalam keluarga. Program Pengurus Kediaman memenuhi tuntutan ekonomi, keselamatan, kediaman, kesihatan dan pengurusan kerohanian. Program Walimah Perdana 1 Terengganu memenuhi tuntutan ekonomi dan semasa perkahwinan. Program Akademi Jahitan memenuhi tuntutan ekonomi. Program Cakna Warga Emas memenuhi tuntutan pembudayaan ilmu, kesihatan dan komunikasi. Program Ibu Tunggal memenuhi tuntutan pengurusan kerohanian, pembudayaan ilmu, pembudayaan ibadah, keselamatan dan ekonomi. Program *2nd Honeymoon* memenuhi tuntutan pengurusan kerohanian, pembudayaan ilmu, pembudayaan ibadah dan komunikasi. Program Taska Permata Keluarga memenuhi tuntutan pembudayaan ilmu, pembudayaan ibadah, kesihatan dan ekonomi. Program Jaya Diri memenuhi tuntutan ekonomi manakala program Desa Keluarga YPKT memenuhi tuntutan kediaman dan persekitaran. Secara lebih terperinci, analisis terhadap prinsip ‘Keluarga Bahagia Rakyat Sejahtera’ berdasarkan komponen dan dimensi pembinaan keluarga sejahtera menurut Islam boleh dirujuk dalam rajah berikut:

Jadual 4: Analisis Prinsip ‘Keluarga Bahagia Rakyat Sejahtera’ Berdasarkan Komponen dan Dimensi Pembinaan Keluarga Sejahtera Menurut Islam

Bil	Program	Komponen	Dimensi
1	Saguhati Anak Kelahiran Terengganu	Ekonomi	Simpanan
2	<i>Home Manager</i> (Pengurus Kediaman)	Ekonomi Keselamatan Kediaman Kesihatan Pengurusan Kerohanian	Taraf hidup Pendapatan Keselamatan dalam rumah Keselamatan luar rumah Kebersihan Pembantu rumah Tahap kesihatan Cara pemakanan Pengurusan Emosi
3	Walimah Perdana 1 Terengganu	Ekonomi Semasa Perkahwinan	Pengurusan Pinjaman Akad pernikahan Walimatul Urus
4	Akademi Jahitan	Ekonomi	Pendapatan
5	Cakna Warga Emas	Pembudayaan Ilmu Kesihatan Komunikasi	Pemilihan ilmu Pemilihan guru Tahap kesihatan Cara pemakanan Aktiviti riadah Pertuturan Bahasa badan Perantaraan
6	Ibu Tunggal	Pengurusan Kerohanian	Pengurusan Emosi Pengurusan Stres Pengurusan Konflik

		Pembudayaan Ilmu	Pemilihan ilmu Pemilihan guru Pemilihan tempat belajar
		Pembudayaan Ibadah	Jenis ibadah Kualiti ibadah Tempat ibadah
		Keselamatan Kesihatan	Undang-undang Tahap kesihatan Cara pemakanan
		Ekonomi	Pendapatan
		Pengurusan Kerohanian	Pengurusan emosi Pengurusan stres Pengurusan Konflik
	7 2 nd Honeymoon	Pembudayaan Ilmu	Jenis Ilmu Pemilihan bahan bacaan Pemilihan guru
		Pembudayaan Ibadah	Jenis Ibadah Kualiti Ibadah Tempat Ibadah Qudwah Ibadah
		Komunikasi	Pertuturan Bahasa badan Perantaraan
	8 Taska Permata Keluarga	Pembudayaan Ilmu	Pemilihan ilmu Pemilihan guru Pemilihan tempat belajar Pemilihan bahan bacaan
		Pembudayaan Ibadah	Jenis ibadah Tempat ibadah
		Kesihatan	Cara pemakanan
		Ekonomi	Pendapatan
	9 Jaya Diri	Ekonomi	Pendapatan Taraf hidup
	10 Desa Keluarga YPKT	Kediaman	Pengurusan pinjaman Bentuk rumah Kemudahan asas kebersihan
		Persekutaran	Jiran Institusi Agama

Secara umumnya, kesemua prinsip ‘Keluarga Bahagia Rakyat Sejahtera’ adalah bertepatan dengan elemen asas kesejahteraan keluarga yang telah dibincangkan oleh tokoh kekeluargaan Islam. Walau bagaimanapun, terdapat beberapa perkara yang perlu diberikan perhatian. Sebagai contoh, elemen kesejahteraan sebelum perkahwinan tidak dilibatkan atau tidak dinyatakan dengan jelas dalam prinsip ini. Hal ini mungkin disebabkan program-program yang melibatkan elemen agama secara khusus telah dilaksanakan oleh jabatan lain seperti Jabatan Hal Ehwal Agama Terengganu. Elemen pengangkutan juga tidak wujud secara jelas dalam program ini. Pihak YPKT Cuma menyediakan perkhidmatan secara tidak berkala seperti memberi perkhidmatan pengangkutan percuma kepada ahli keluarga yang ingin menyertai sebarang program serta khidmat nasihat berhubung pengurusan kewangan dan hutang menerusi program Jaya Diri.

Secara lebih khusus, masih terdapat elemen-elemen kecil yang tidak dipenuhi serta memerlukan penambahbaikan terutamanya berhubung elemen pembudayaan ilmu dan pembudayaan ibadah. Antara perkara lain yang perlu diberikan perhatian secara serius oleh pihak YPKT ialah pembinaan asas atau sumber yang kukuh berhubung kekeluargaan Islam sebelum pelaksanaan program. Program yang dilaksanakan tidak disandarkan kepada sebarang teori kekeluargaan secara jelas sama ada teori dari Barat mahupun Islam kecuali Taska Permata Keluarga yang mempunyai modul khusus. Asas teori ini sangat penting bagi memastikan setiap program dapat dijalankan secara seragam dan tiada sebarang keperluan utama yang keciciran. Teori juga akan bertindak sebagai kayu pengukur kepada jangkaan hasil serta penambahbaikan yang boleh dilakukan pada tahap yang seterusnya.

5.0 KESIMPULAN DAN CADANGAN

Berdasarkan penelitian penulis, program-program yang dijalankan di bawah prinsip ‘Keluarga Bahagia Rakyat Sejahtera’ dalam Transformasi Terengganu Baharu (TTB) adalah satu pendekatan yang sangat baik dalam menangani isu-isu masyarakat, terutamanya dalam hal yang melibatkan tuntutan dan keperluan dalam pembinaan sebuah keluarga yang sejahtera menurut Islam. Kesemua 10 program yang dilancarkan iaitu Program Saguhati Anak Kelahiran Terengganu, Pengurus Kediaman, Walimah Perdana 1 Terengganu, Akademi Jahitan, Cakna Warga, Ibu Tunggal, *2nd Honeymoon*, Taska Permata Keluarga, Jaya Diri dan Desa Keluarga YPKT memenuhi dua elemen asas dalam pembinaan sebuah keluarga yang sejahtera iaitu Perkahwinan Sejahtera dan Rumah Tangga Sejahtera. Pun begitu, masih terdapat beberapa kekurangan yang perlu diperbaiki dari semasa ke semasa terutamanya berhubung aspek sumber asas dalam pembentukan program kekeluargaan.

Sebagai cadangan, pihak berwajib sama ada pihak YPKT mahupun pihak pentadbiran negeri Terengganu sewajarnya melibatkan penyelidikan dan kajian terperinci dan menyeluruh terhadap elemen-elemen kesejahteraan keluarga menurut Islam. Kajian ini boleh dibuat dengan melihat kepada nas-nas al-Quran, hadis serta penulisan Islam dalam bidang kekeluargaan Islam. Dari sudut pelaksanaan, kajian ini juga penting bagi memastikan kelancaran, keseragaman dan keberkesanannya sebuah program.

Dari sudut politik dan ekonomi pula, kajian ini penting bagi menjawab persoalan yang bakal ditimbulkan oleh sebahagian masyarakat berhubung keperluan diadakan sesuatu program agar tidak membawa kepada pembaziran wang, masa dan tenaga penggerak. Dari sudut kemasyarakatan, pihak berwajib sewajarnya memberikan panduan yang lebih jelas kepada masyarakat. Satu buku panduan keluarga sejahtera, senarai semak keluarga sejahtera, risalah atau edaran kecil perlu diterbitkan dan diedarkan secara percuma kepada setiap keluarga. Ini penting bagi memaklumkan usaha yang dilakukan oleh pihak YPKT mahupun kerajaan negeri mempunyai dasar dan matlamat yang jelas. Selain itu, satu mekanisme pengukuran boleh dibentuk menggunakan instrumen baru atau sedia ada seperti borang soal-selidik bagi meneliti keberkesanannya dan pencapaian program. Ini penting bagi membuktikan keberkesanannya secara statistik dan memberi impak.

Akhirnya dari sudut pentadbiran kerajaan, sewajarnya satu dasar yang memberi panduan khusus terhadap pembangunan keluarga sejahtera digubal oleh pihak kerajaan negeri Terengganu. Dasar ini akan bertindak sebagai hala tuju dan panduan pelaksanaan dan penguatkuasaan kepada pihak kerajaan dan badan bukan kerajaan yang bertanggungjawab serta pihak yang berkepentingan.

PENGHARGAAN

Projek ini dibiayai di bawah Skim Geran Penyelidikan Nic (NRGS-KPM) UniSZA/NRGS/2013/RR057, Universiti Sultan Zainal Abidin (UniSZA), Kuala Terengganu. Setinggi-tinggi penghargaan kepada Jabatan Pendidikan Malaysia, Kementerian Pelajaran Malaysia, Jabatan Penjara Marang, Yayasan Pembangunan Keluarga Terengganu (YPKT) dan Universiti Sultan Zainal Abidin atas bantuan yang diberikan kepada projek ini.

RUJUKAN

- Abdul Rasyid, A.R. (2011). *Keterampilan wanita alaf baru*. Kuala Lumpur: Utusan Publications & Distributors Sdn Bhd.
- Al-Hasyimi, A. (2010). *Syakhsiah Al-Muslim Kama Yasughuba Al-Islam fi Al-Kitab wa Al-Sunnah*. Riyadh: Dar Al-Basyair Al-Islamiyyah.
- Al-Nahlawi, A.R. (1986). *Usul al-Tarbiyyah al-Islamiyyah wa Asalibuhu*. Damsyik: Dar al-Fikr.
- Al-Shahud, A.N. (2009). *Subul al-Saadah al-Zawjiyyah*. Pahang: t.t.p.
- Al-Siddiqi, I.A. (1998). *Dalil al-Falihin*. Kaherah: Dal al-Hadis.
- Al-Za'Balawi, M.-S. (1985). *Al-Umumah fi al-Quran al-Karim wa al-Sunnah al-Nabawiyyah*. Beirut: Muassasah al-Risalah.
- Al-Zuhayli, W. (2000). *Al-Usrah al-Muslimah fi al-'Alam al-Mu'asirah*. Damsyik: DÉr al-Fikr.
- Asyur, I. (1997). *Tafsir Al-Tahrir wa Al-Tanwir*. Tunisia: Dar Sahnun li al-Nashr wa al-Tawzi'.
- Awad Ibrahim, M. (1983). *Al-Islam wa al-Usrah al-Saidah*. Kuwait: Wakalah al-Matbuuat Shari' Fahd al-Salim.
- Hashim, C.N. (2002). *Cabar, halangan dan pendekatan strategik dalam pembentukan keluarga bahagia*. Kuala Terengganu: Percetakan Yayasan Islam Terengganu Sdn. Bhd.
- Hawwa, S. (1988). *Qawanin al-Bayt al-Muslim*. Kaherah: Muassasah al-Khalij al-Arabi.
- Ismail, R., Ahmad, N.A., Ibrahim, F., & Nen, S. (2017). Pengaruh faktor individu, keluarga dan persekitaran sosial terhadap tingkah laku penyalahgunaan bahan dalam kalangan remaja. *Akademika*, 87(1), 7-16.
- Jabatan Perdana Menteri, JPM. (1989). *Ayat-ayat ehwal wanita dalam al-Quran*. Kuala Lumpur: Bahagian Hal Ehwal Islam, Jabatan Perdana Menteri.
- Jawatankuasa Penyemak, JAKIM. (2008). *Memasuki gerbang perkahwinan*. Putrajaya: Jabatan Kemajuan Islam Malaysia.
- Lembaga Penduduk dan Pembangunan Keluarga Negara, LPPKN. (2017). *Laporan kajian indeks kesejahteraan keluarga Malaysia 2016*. Kuala Lumpur: Kementerian Pembangunan Wanita, Keluarga dan Masyarakat.
- Md. Ali, A.W. (2017). *Pembinaan indikator kesejahteraan keluarga menurut Islam*. (Tesis PhD tidak diterbitkan). Universiti Sultan Zainal Abidin, Malaysia.
- Md. Yusoff Al-Haj, M.T. (1990). *Panduan munakahat*. Kuala Lumpur: Asa Trading.

- Muhammad, M. & Md. Nawi, N.H. (2013). *Indahnya didikan awal anak cara Islam*. Selangor: PTS Millenia Sdn. Bhd.
- Najib, I. (1980). *Al-Usrah al-Mustla fi Qa' al-Quran wa al-Sunnah*. Riyadh: Maktabah Maaarif.
- Naseh Ulwan, A. (2008). *Tarbiyyah al-Awlad fi al-Islam*. Kaherah: Dar al-Salam.
- Sharmani, Y. & Minggal, M.T. (2011). *Teori kaunseling al-Ghazalli mengenai ilmu, sejarah dan kandungan al-Quran*. Kuala Lumpur: PTS Islamika Sdn. Bhd.
- Shin, D.C. & Johnson, D.M. (1978). Avowed happiness as an overall assessment of the quality of life. *Social Indicators Research*, 5(1-4), 475-492.
- Sulaiman, S. & Ismail, A. (2017). Pengaruh didikan keluarga di rumah dalam kalangan penagih dadah. *Jurnal Sultan Alauddin Sulaiman Shah*, 4(1), 93-103.
- Wan Ahmad, W.I., Redzuan, M., Emby, Z., & Hamid, A.H. (2009). Kesejahteraan subjektif warga tua di Malaysia: Kes warga tua desa Kelantan. *International Journal of Management Studies*, 16(2), 63-96.
- Yayasan Pembangunan Keluarga Terengganu, YPKT. (2015). *Pamflet prinsip “keluarga bahagia rakyat sejahtera”*. Kuala Terengganu: Yayasan Pembangunan Keluarga Terengganu.